

**Inatsisartut aalajangiiffigisassaattut siunnersuutigineqarpoq, Naalakkersuisut peqquneqassasut danskit oqartussa qarfiinut attaveqassasut Aalborgimi Grønlandshavnimiit Kalaallit Nunaannut umiarsuakkut nassiussassat tamarmik hashitaqanginersut akitsuuserisunit misissorneqartarnissaat qulakkeerumallugu aalajangersimasumik Grønlandshavnimi akitsuuserisoqartitsilersinnaanerup siunnerfigineqarnissaa.**

(Inatsisartunut ilaasortaq Steen Lyngé, Atassut)

### **Akissuteqaat**

(Aningaasaqarnermut Aatsitassanullu Naalakkersuisoq)

### **Siullermeerneqarnera**

Inatsisartunut ilaasortaq Steen Lyngé Aalborgimi Grønlandshavnimi aalajangersimasumik ilanngaaserisoqalernissaa anguniarlugu Naalakkersuisut danskit oqartussaasuinut saaffiginnissamik peqquneqarnissaat pillugu Inatsisartuni aalajangiiffigisassatut siunnersuummik saqqummiussa qarpoq.

Ikiaroorniutit inuiaqatigiinnut kalaallinut inuttut aningaasaqarnikkullu annertuumik ajornartorsiuteqalertitsisarnerat Steen Lyngé siunnersuutini ilaatigut siunnersuutimini tunngavilersuutigaa. Tunngavilersuutillu tamakku kialuunniit akerlerisinnaangilai.

Aalajangersumik oqaatigissavara: Naalakkersuisut hash-imut akuersaanngilluinnarmata! Taamaattumik ikiaroorartunik anngiortumik eqqussuinerup akiorneqarnissaanik ilaasortap isumaa Naalakkersuisut isumaqatigaat, taamaattoq Kalaallit Nunatsinnut allakkanik poortukkanillu timmisartukkut nassiussuinerumi assingusumik nakkutilliisoqalertinnagu, Aalborgimi aalajangersimasumik ilanngaaserisoqalernissamik pilersitsineq ajornartorsiummik ataavartumik aaqiinermut ilapittuutaanaviangitsoq Naalakkersuisut isumaqarput.

Taamattaarlu Aalborgimi aalajangersimasumik akitsuuserisoqalernera umiarsuarnik, soorlu kilisaatinik, namminersortut angallataannik allanillu nunanit/umiarsualivinnit allaneersunit tikittoqartillugu nakkutilliinermut aaqiissutaanaviangilaq.

Taamattaarlu umiarsuit nunat tamat akornanni imartami puttaqummik poortukkamik qilersivigineqarsimasumik avammut igitsinissamik periarfissaqarput, taannalu kingorna angallatinit piffimmeersunit aaneqarsinnaavoq. Sineriassuattalu kilometerinik tuusintilinnik arlalinnik isorartutiginera eqqarsaatigalugu, suliaq tamanna nakkutilliinerinnakut qaangersinnaannginnatsigu oqaatigissallugu piviusorsiortuuvoq.

Inatsisillu unioqquutillugit nioqquutissanik inerteqqutaasunik anngiortumik eqqussuinnermi periutsit siuliani taaneqartut ilisimaneqareersuunerat, siusinnerusukkullu iluatsitsiffiusumik iluatsinngitsumillu atorneqartarnerat oqaatigineqassaaq.

Containerinut scannerutip pisiarinerata 20 mio. kr-it missaannik akeqarsinnaanerani kiisalu Aalborgimi pioreersut allanngortiterneqarnerannut aningaasartuutit eqqarsaatigalugit taamatullu ukiumut inuit qulit missaanni sulisinnerannut aningaasartuutit eqqarsaatigalugit, Steen Lyngep siunnersuutaa aaqqiissutissaavoq akisooq.

Siusinnerusukkut oqaatigineqareersutut, ikiaroorartunik anngiortumik eqqussuineq akiorniarneqassasoq Naalakkersuisut isumaqatigaat, Naalakkersuisullu Akileraartarnermut Aqutsisoqarfik peqatigalugu pineqartumik nakkutilliinermik ataavartumik nukittorsartuarpaat. Assersuutitullu 2016-imi Kangerlussuarmi aalajangersimasumik ilanngaaserisumik ikiaroorartunik ujarlernermi qimmilimmik atorfinitsitsisoqarnera taaneqassaaq, soorluttaaq Akileraartarnermut Aqutsisoqarfik bodyscannerimik Kangerlussuarmi atugassamik pisinissamik isumaqatigiissuteqangajalersoq.

Bodyscanneri 2016-ip naannginnerani tunniunneqarnissaa ilimagineqarpoq, taannalu 2017-imi qaammatini pingasuni siullerni atorneqalersussatut naatsorsuutigineqarpoq.

Naalakkersuisut danskit naalakkersuisuinik pissutsit assigiinngitsut pillugit ataavartumik oqaloqatiginnittuarput, tassanilu aamma Akileraartarnermut Aqutsisoqarfiup SKAT Danmarkillu akornanni isumaqatigiissutit ilanngullugit, piffissamilu aggersumi periarfissaq siulleq atorlugu ilaatigut Kalaallit Nunatsinnut ikiaroorartunik anngiortumik eqqussuisarnerup nakkutigineqarnerata Namminersorlutik Oqartussat danskillu naalakkersuisui peqatigiillutik patajaallisaavigineqarnissaa pillugu suliaq qaqeqqilersaarpara.

Naalakkersuisut paasinninnerat naapertorlugu Aalborgimi aalajangersimasumik akitsuuserisoqalerneru Kalaallit Nunatsinnut isaarissanik allanik taamatut nakkutilliinermik ilaqartinnagu, ajornartorsiummik piffimmit piffimmut nuussineruinnassaaq eqqussorneqartut amerlasuusaasa annikinnerulernerannik kinguneqarnavianngitsoq. Aalborgimi aaqqiineq "iluanaarutigineqarsinnaasumut" sanilliullugu akisuallaartutut Naalakkersuisut isigaat. Taamaammallu siunnersuut itigiartitsissutigineqassasoq Naalakkersuisut inassutigaat.